



Nuummi Nunatsinnilu Airdomes-imut tunngatillugu – § 37 naapertorlugu apeqqummut nr. 042/2026-mut akissut

06-03-2026
Suliap normua 2026 - 3567
All. nr. 26282521

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Asasakka Mette Arge-Hammeken aamma Gerth Mikaelson.

Inatsisartut suleriaasiat naapertorlugu apeqqutitut saqqummiussanut qujanaq. Apeqqutit
tullinnguuttuni akissuteqarfingissavakka.

Apeqqut 1: Kalaallit Nunaanni Airdome-nik pilersitsinissamik Kalaallit Nunaanni Timersoqatigiit Kattuffiata suliniutaata Naalakkersuisut tapersersornissaa pilarsaarutigaa?

a. Taamaappat qanoq tapersiisoqassava, najugaqarfinnilu sorlarni tamanna pingaarnersiuffigineqassava?

Akissut: Naalakkersuisut paasinninnerat malillugu apeqqummi Kalaallit Nunaanni
Arsaattartut Kattuffiata suliniutaata pineqarpoq, tassa Kalaallit Nunaanni Timersoqatigiit
Kattuffiata suliniutaata pineqarani, tamannalu tunngavigalugu apeqqut akineqarluni.

Naalakkersuisunit nuannaarutigineqarpoq, KAK – Kalaallit Nunaanni Isikkamik
Arsaattartut Kattuffiat – ilaasortamik sungiusarnermi atortagaannik
pitsanngorsaannissamut periarfissanik misissuiniarluni suliniummik aallartisisimammat,
tassunga ilanngullugu Airdomes-imik Kalaallit Nunaanni pilersitsinissamut periarfissanik
qulaajaaniarmat. Naalakkersuisut KAK-mik ataatsimeeqateqarsimapput, tassanilu
suliniutigineqartumik saqqummiuffigineqarlutik. Naalakkersuisut KAK-p suliaannut
tapersersuipput, timersornermilu atortut nutaaliaasut ukiorlu naallugu atorneqarsinnaasut
qanoq nunami timersornermut pitsanngorsaataasinnaaneranik kattuffiup
misissuiniarnera tikilluaqqullugu.

Suliniut suli qulaajaaffigineqarpoq, tassani kommunit soqutiginnissinnaasut teknikkikkut,
aningaasaqarnermut silallu pissusaanut tunngasunik misissueqqissaarnissaat
pingaaruteqarpoq. Tassunga atatillugu KAK-mit Finlandimut paasisassarsiorluni
angalanissamut qaaqqusisoqarsimavoq, tassani kommunit Naalakkersuisullu
qaaqqusanut ilaallutik. Nunanit aqqissuussanik taama ittunik atuiffioreersunit
misilittakkaniq pissarsinissaq aamma suliamut attuumassuteqartut ataatsimut
ilisimasaqalersinneqarnissaat siunertarineqarlutik. Ilinniartitaanermut, Kultureqarnermut,
Timersornermut Ilageeqarnermullu Naalakkersuisoqarfimmit peqataasoqarpoq.

Pingaarateqarpoq erseqqissaassutigissallugu, Timersorneq timigissarnerlu pillugit
Inatsisartut inatsisaani nr. 15, 6. juni 2016-imeersumi §§ 14-16 naapertorlugit

timersornermi atortut tunngaviatigut kommuninit akisussaaffigineqarnerat. Kommunit taamaammat najukkami timersornermi atortunik pilersitsinissaq, ingerlatsinissaq salliutitsinissarlu akisussaaffigaat, Naalakkersuisullu nuna tamakkerlugu najukkanilu timersornermi atortunik sanaartornissamut aaqqissuussinissamullu tapiissuteqarsinnaallutik. Naalakkersuisut tamanna tunngavigalugu kommunit sinnerlugit najugaqarfiit sorliit airdome-mik atuilersinneqarnissaannik salliutitsinnaanngillat.

Naalakkersuisut sanaartornermut tapiissuteqassappata, Inatsisartut aningaasanik pisariaqartinneqartunik Aningaasanut Inatsimmi immikkoortitsisimasariaqarput. Naalakkersuisunit tapiissuteqartoqassappat taamaammat qinnuteqaatigineqartut, teknikkikkut aningaasaqarnikkullu atugassiissutaasut pillugit Inatsisartut aalajangiussaata apeqquataassapput.

Amerlanerit aningaasaliisinnaanissaannik qulakkeerinninniarluni suliaqarnermut atatillugu Naalakkersuisut siorna KAK-p suliniutaanik danskit Kulturministeriannut ingerlatitseqqiisimapput, tassani aningaasaleeqataasinnaasunik pissarsisinnaaneq siunertaralugu. Maanna nalunaarutigineqarsimalerpoq, suliniutip ingerlateqqinneqarnissaanut danskit 2026-mut aningaasanut inatsisaanni Nunanut Atlantikup avannaaniittunut aningaasaliissutaasartunit tapiissutissat annikinnerusut ukioq maannamut immikkoortitsisoqarsimasut. Tapiissutigineqartut taakku maanna misissueqqissaarnernut piaareersaataasumillu misissuinernut tapersiissapput.

Naalakkersuisunit suliniutip ingerlanneqarnera qanimut malinnaaffigineqarpoq, misissuinermilu paasisat erseqqinnerulerpata aamma kommunit salliutinniagaat paasinarsippata, qanoq Naalakkersuisut – inatsimmi aamma aningaasanut inatsimmi atugassarititaasut iluini – suliniummut tapersiisinaanersut pillugit oqaloqateqarnissamut ammallutik.

Inussiarnersumik inuulluaqqusillunga


Nivi Olsen